



O‘ZBEKISTON RESPUBLIKASI VAZIRLAR MAHKAMASINING QARORI

20 26 yil « 25 » iyun № 327

Toshkent sh.

Ўзбекистон Республикаси Одил судлов академияси магистратурасига ўқишга қабул қилиш тартиби тўғрисидаги низомни тасдиқлаш ҳақида

Ўзбекистон Республикаси Президентининг “Одил судлов соҳасида юқори малакали кадрлар тайёрлаш тизимини тубдан такомиллаштириш чора-тадбирлари тўғрисида” 2025 йил 21 августдаги ПФ–141-сон Фармонига мувофиқ, шунингдек, Ўзбекистон Республикаси Одил судлов академияси магистратурасига ўқишга қабул қилиш тартибини белгилаш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг “Одил судлов соҳасида юқори малакали кадрлар тайёрлаш тизимини тубдан такомиллаштириш чора-тадбирлари тўғрисида” 2025 йил 21 августдаги ПФ–141-сон Фармонига мувофиқ Ўзбекистон Республикаси Одил судлов академиясида 2026/2027 ўқув йилидан бошлаб “Суд фаолияти” мутахассислиги бўйича амалий **магистратура дастури асосида ўқитиш** ташкил этилиши белгилангани маълумот учун қабул қилинсин.

2. Қуйидагиларни назарда тутувчи **Ўзбекистон Республикаси Одил судлов академияси магистратурасига ўқишга қабул қилиш тартиби тўғрисидаги низом** иловага мувофиқ тасдиқлансин:

магистратура босқичида ўқув жараёни таълимнинг кундузги ва кечки шаклларида тўлов-контракт асосида ташкил этилиши;

магистратура дастурлари бўйича қабул параметрлари, тўлов-контракт қиймати ҳар йили Ўзбекистон Республикаси Одил судлов академияси кенгаши таклифи асосида Ўзбекистон Республикаси Судьялар олий кенгаши томонидан тасдиқланиши;

магистратура мутахассислигига ички ва ташқи абитуриентлар алоҳида танлов асосида қабул қилиниши;

магистратура дастури бўйича таълим олиш муддати бир йилни ташкил этиши, битирувчиларга магистратура мутахассислиги бўйича давлат намунасидаги диплом берилиши.

3. Ушбу қарорнинг бажарилишини назорат қилиш Ўзбекистон Республикаси олий таълим, фан ва инновациялар вазири К.А. Шарипов зиммасига юклансин.

**Ўзбекистон Республикасининг
Бош вазири**



А. Арипов

**Ўзбекистон Республикаси Одил судлов академияси магистратурасига
ўқишга қабул қилиш тартиби тўғрисида
НИЗОМ**

1-боб. Умумий қоидалар

1. Ушбу Низом Ўзбекистон Республикаси Президентининг “Одил судлов соҳасида юқори малакали кадрлар тайёрлаш тизимини тубдан такомиллаштириш чора-тадбирлари тўғрисида” 2025 йил 21 августдаги ПФ–141-сон Фармонига мувофиқ Ўзбекистон Республикаси Одил судлов академияси (кейинги ўринларда – Академия) магистратурасига (кейинги ўринларда – магистратура) ўқишга қабул қилиш тартибини белгилайди.

2. Ушбу Низомда қуйидаги асосий тушунчалардан фойдаланилади:

Ўзбекистон Республикаси Одил судлов академияси кенгаши (кейинги ўринларда – Академия Кенгаши) – Академия ректори раҳбарлик қиладиган жамоатчилик бошқаруви органи;

Академия қабул комиссияси – магистратура мутахассислиги бўйича ўқишга қабул қилиш учун танлов ўтказиш, абитуриентлардан ҳужжатларни қабул қилиш ва уларга маслаҳатлар бериш ҳамда бошқа ташкилий масалаларни ҳал этиш учун ҳар йили Академия ректори буйруғи билан камида 5 нафар аъзодан иборат таркибда тузиладиган комиссия;

ички абитуриент – олий юридик маълумотга эга бўлган, суд тизимида, судьялар ҳамжамияти органлари ва муассасаларида камида 3 йиллик иш стажига эга бўлган, шунингдек, Ўзбекистон Республикаси Президенти ёки Президент Администрацияси раҳбари томонидан тайинланадиган ёки келишиб олинадиган лавозимларда фаолият юритиб келаётган ҳамда ушбу Низом талаблари асосида магистратурага ўқишга кириш танловларида иштирок этувчи шахс;

ташқи абитуриент – олий юридик маълумотга эга бўлган ҳамда ушбу Низом талаблари асосида магистратурага ўқишга кириш танловларида иштирок этувчи шахс.

3. Магистратура мутахассислигига қабул жараёни таълимнинг кундузги ва кечки таълим шакллари учун амалга оширилади.

4. Магистратурада ўқиш муддати – кундузги ва кечки таълим шакллари учун бир йилни ташкил этади.

5. Магистратура мутахассислигининг кечки таълим шаклида (кундузги таълимдан фарқли равишда) бир ҳафтада одатда, беш кун ўқитилади ва ҳафталик ўқув соати ҳажми 20 академик соат қилиб белгиланади.

6. Кечки таълимда ўқиш кундузги смена меҳнат фаолиятдан кейинги вақтда аудитория машғулоти (маъруза, амалий машғулоти ва бошқалар) шаклида амалга оширилади.

7. Магистратурага қабул қилишда абитуриентларнинг муайян тоифаларига республиканинг бошқа олий таълим ташкилотларига кириш учун қонунчилик ҳужжатларида назарда тутилган имтиёзлар татбиқ этилмайди.

8. Магистратурада ўқитиш тўлов-контракт асосида ташкил этилиб, магистратура дастурлари бўйича ички ва ташқи абитуриентлар қабул параметрлари, тўлов-контракт қиймати ҳар йили Академия Кенгаши таклифи асосида Ўзбекистон Республикаси Судьялар олий кенгаши томонидан тасдиқланади.

Академиянинг магистратура босқичига тўлов-контракт асосида қабул қилинган ва таълим олаётган хотин-қизларнинг тўлов-контракт суммасини тўлаш бўйича имтиёзлар қонунчиликка мувофиқ қўлланади.

9. Академиянинг магистратура мутахассислигига қабул ушбу Низомда белгиланган ўзига хос қоидаларни инобатга олган ҳолда, Вазирлар Маҳкамасининг 2025 йил 13 сентябрдаги 578-сон қарори билан тасдиқланган Олий таълим ташкилотларининг магистратурасига ўқишга қабул қилиш тартиби тўғрисидаги низом асосида Академия қабул комиссияси томонидан амалга оширилади.

10. Магистратура мутахассислигига қабул тенг ҳуқуқлилик, ягона қабул қоидалари ва танлов асосида амалга оширилиб, кириш имтиҳонида юқори балл тўплаган абитуриентлар тўплаган баллари рейтинги асосида қабул қилинади.

11. Магистратурага юриспруденция бакалавриат таълим йўналиши ва Ўзбекистон Республикаси Олий таълим, фан ва инновациялар вазирлиги томонидан белгиланган магистратурага қабул бўйича турдош олий таълим йўналишлари рўйхати бўйича бакалавр даражасига эга бўлган шахслар ўртасида танлов асосида қабул қилинади.

12. Танлов, қоида тариқасида, август ойида магистратурада ўқитиладиган тилда ўтказилади.

Қабул параметрларининг ўқитиш тили бўйича тақсимооти Академия Кенгаши томонидан белгиланади.

13. Магистратура битирувчиларига магистратура мутахассислиги бўйича давлат намунасидаги диплом берилади.

2-боб. Академия қабул комиссияси фаолиятини ташкил этиш ва ҳужжатларни қабул қилиш

14. Академия қабул комиссияси раиси, раис ўринбосари, аъзолар ва масъул котибдан иборат таркибда шакллантирилади ва унинг фаолияти масъул котиб томонидан мувофиқлаштирилади.

15. Академия қабул комиссияси мажлисида аъзоларнинг учдан икки қисми иштирок этганда, у ваколатли ҳисобланади. Овозлар сони тенг бўлганда, Академия қабул комиссияси раисининг овози ҳал қилувчи ҳисобланади.

16. Академия қабул комиссияси магистратурага қабул бошланишидан бир ой олдин қабул муддати, мутахассислик шифри ва номи, қабул параметрлари, танлов ўтказиш тартиби тўғрисидаги маълумотларни, шунингдек, кириш имтиҳони ўтказиладиган имтиҳон дастурини Академиянинг расмий веб-саҳифаси ва ижтимоий тармоқларида ҳамда оммавий ахборот воситаларида эълон қилади.

17. Абитуриентлар ҳар йили 1 июлдан 30 июлгача (30 июль куни ҳам) Ўзбекистон Республикаси Ягона интерактив давлат хизматлари портали орқали рўйхатдан ўтказилади ҳамда ҳужжатлари электрон платформага юкланади.

Ички абитуриентлардан қўшимча равишда маълумотнома (объективка), меҳнат дафтарчаси талаб этилади, хорижий тилни билиш даражасини белгиловчи миллий ёки халқаро сертификат эса ички абитуриентнинг хоҳишига кўра тақдим этилиши мумкин.

18. Кириш имтиҳони ўтказиладиган бино ва аудиторияларда уларни ўтказиш учун санитария ва ёнғин хавфсизлиги қоидаларига тўлиқ жавоб берадиган зарур техник, тиббий ва маиший шароитлар яратилиши таъминланади.

3-боб. Танловни ўтказиш

19. Ташқи абитуриентлар учун магистратурага қабул Вазирлар Маҳкамасининг 2025 йил 13 сентябрдаги 578-сон қарори билан тасдиқланган Олий таълим ташкилотларининг магистратурасига ўқишга қабул қилиш тартиби тўғрисидаги низом асосида Академия қабул комиссияси томонидан амалга оширилади.

20. Ички абитуриентлар учун магистратурага қабул мутахассислик фанларидан, шунингдек, хорижий тилни билиш даражасини белгиловчи миллий ёки халқаро сертификат бўлмаган тақдирда, чет тилидан тест шаклидаги танлов орқали амалга оширилади.

Бунда баҳолаш мезонлари қуйидагича белгиланади:

мутахассислик фанлари бўйича 40 та тест учун – 80 балл;

чет тили бўйича 10 та тест учун – 20 балл.

Тест синовларида энг кўп (максимал) тўпланиши мумкин бўлган балл 100 баллни ташкил этади. Кириш имтиҳонида 56 ва паст баллни тўплаган абитуриентлар ўқишга қабул қилинмайди.

Тест синовлари Академия томонидан ёки унинг буюртмасига кўра Ўзбекистон Республикаси Олий таълим, фан ва инновациялар вазирлиги ҳузуридаги Билим ва малакаларни баҳолаш агентлиги (кейинги ўринларда – Агентлик) томонидан қонунчиликда белгиланган тартибда ўтказилади.

21. Тест синовлари Агентлик томонидан ўтказилган тақдирда, уларни ташкил этиш ва ўтказишда қуйидаги тартиблар эътиборга олинади:

мутахассислик фанлари бўйича тест топшириқлари Академия томонидан тақдим этилган дастурлар асосида тавсия этилган мутахассислар томонидан Агентлик биносида махфийлик таъминланган ҳолда шакллантирилади. Бунда тест топшириқлари ўқитиш тилида тузилади ҳамда ҳар бир савол учун тўртта жавоб варианти келтирилиб, улардан фақат биттаси тўғри бўлади;

тест синовларида қатнашувчи абитуриентларнинг рўйхати (фамилияси, исми ва отасининг исми, жисмоний шахснинг шахсий идентификация рақами (ЖШШИР)) Академия томонидан Агентликка тақдим этилган кундан бошлаб ўн беш кун ичида Агентлик томонидан Академия билан келишган ҳолда тест синовни ўтказиш санаси ва вақти белгиланиб, Академия бу ҳақида хабардор қилинади;

абитуриентлар тест синовларига шахсини тасдиқловчи ҳужжат (фуқаролик паспорти, идентификацияловчи ID-карта, фуқаронинг хорижга чиқиш биометрик паспорти ёки ҳайдовчилик гувоҳномаси) асосида киритилади;

тест синовлари ўтказиладиган бинога абитуриентлар махсус текширувдан ўтказилган ҳолда киритилади. Бунда жадвал, китоб, мобил телефон, компьютер, калькулятор, телекоммуникация воситалари ҳамда бошқа ёрдамчи материалларни олиб кириш, шунингдек, тест жараёнида ўзаро мулоқот қилиш ёки бир-бирига ёрдам бериш тақиқланади. Ушбу талабларни бузган шахслар тест синовидан четлаштирилади ва тестдан ўтмаган деб ҳисобланади.

22. Тест синовларида иштирок этиш учун қонунчиликда белгиланган тартибда абитуриентлардан базавий ҳисоблаш миқдорининг 50 фоизи миқдорида тўлов ундирилади.

Тест синовлари Агентлик томонидан ўтказилган тақдирда, тўлов Билим ва малакаларни баҳолаш агентлиги фаолиятини ривожлантириш жамғармасининг ҳисобрақамига ўтказилади.

23. Академияга ўқишга қабул қилинган ички абитуриентларнинг синов ишлари улар шахсий ҳужжатларининг йиғмажилдларига киритилади.

24. Кириш имтиҳонини ўтказиш жадвали Академия қабул комиссиясининг қарори билан тасдиқланади. Қарорга кириш имтиҳонида иштирок этиш ҳуқуқига эга бўлган ички абитуриентлар рўйхати, қоида тариқасида, гуруҳларга бўлинган ҳолда илова қилинади.

25. Кириш имтиҳони ўтказиладиган имтиҳон дастури Академия қабул комиссияси томонидан тасдиқланади.

26. Кириш имтиҳони ўтказилишига қадар Академия қабул комиссияси томонидан синов фанлари бўйича тасдиқланган маслаҳатлар жадвалига мувофиқ машғулотлар ташкил этилади.

27. Ички абитуриентлар кириш имтиҳонини топшириш учун белгиланган вақт ва жойга ўз шахсини тасдиқловчи ҳужжат билан келиши лозим. Белгиланган вақтдан кеч қолган ички абитуриентлар синовга киритилмайди, синовда қатнашмаган ички абитуриентлар учун қўшимча синов ўтказилмайди.

28. Ички абитуриентларнинг кириш синовлари давомида аудиториядан чиқиши тақиқланади. Уларнинг соғлиғи ёмонлашиши ва бошқа зарур ҳолатларда синов материалларини қолдириб, кузатув остида аудиториядан чиқишга рухсат берилади.

29. Кириш имтиҳонини ўтказиш тартибини бузган ички абитуриентлар аудитория кузатувчилари томонидан далолатнома расмийлаштирган ҳолда синовдан четлаштирилади ва уларнинг синов ишлари баҳоланмайди.

30. Кириш имтиҳони натижалари тест натижалари тақдим этилган вақтдан эътиборан 24 соат давомида Академия расмий веб-сайтида эълон қилинади.

4-боб. Танлов натижалари бўйича шикоятларни кўриб чиқиш

31. Ички абитуриентларнинг кириш имтиҳони натижалари бўйича шикоятлари натижалар эълон қилинган кундан бошлаб уч иш куни ичида Академия қабул комиссияси томонидан тасдиқланган камида уч нафардан иборат Апелляция комиссиясига тақдим этилади.

Апелляция комиссияси шикоятни берилган кундан бошлаб уч иш куни ичида кўриб чиқади.

Агентлик томонидан ўтказилган тест синовлари бўйича шикоят у Академия томонидан Агентликка тақдим этилган санадан бошлаб беш иш кунидан кечикмасдан кўриб чиқилади ва шикоятни кўриб чиқиш натижаси юзасидан қабул қилинган хулосалар Агентлик томонидан Академияга тақдим этилади.

Шикоят кўриб чиқилиб, қарор қабул қилинган куни абитуриентга шикояти қаноатлантирилгани ёки рад этилгани тўғрисида Академия томонидан ёзма равишда хабар берилади.

Апелляция комиссиясининг таркибига Академия қабул комиссияси аъзолари киритилмайди.

32. Кириш имтиҳони натижалари бўйича шикоятларни кўриб чиқиш куни ва вақти ҳақида Академия расмий веб-сайтида эълон берилади.

33. Ички абитуриентларнинг апелляция шикоятларини кўриб чиқиш натижасида Апелляция комиссияси:

кириш имтиҳони натижаларини ўзгаришсиз қолдириши ва шикоятни қаноатлантиришни рад этиши;

ички абитуриентнинг шикоятини қаноатлантириши мумкин.

Ички абитуриентнинг шикояти қаноатлантирилган тақдирда, Апелляция комиссияси ички абитуриентнинг кириш имтиҳони ишига узил-кесил балл қўяди ва қабул қилинган якуний қарор ҳақида унга хабар беради.

Ички абитуриентлар Апелляция комиссияси қарори устидан қонунчиликда белгиланган тартибда судга мурожаат қилиши мумкин.

5-боб. Ўқишга қабул қилиш тартиби

34. Академия қабул комиссияси томонидан тест синовлари баллари жамланиб, умумий қайдномада таълим шакллари бўйича шакллантирилади.

Рўйхатда ички абитуриентлар тўплаган энг юқори баллдан бошлаб камайиб бориш тартибида ўқишга қабул қилинганлар танлаб олинади.

35. Умумий қайднома асосида Академия қабул комиссияси томонидан абитуриентларни магистратурага ўқишга қабул қилишга тавсия этиш тўғрисида баённомалар расмийлаштирилиб, тасдиқланади.

36. Академия қабул комиссиясининг баённомаларига асосан Академия ректорининг тўлов-контракт асосида абитуриентларни дарсга қўйиш ҳақидаги буйруғи чиқарилади ҳамда бу ҳақдаги маълумот Академия расмий веб-сайтига жойлаштирилади.

Тўлов-контракт асосида ўқишга қабул қилиш тавсия этилган абитуриентлар шартномада белгиланган тўлов суммасининг тегишли қисмини белгиланган муддатда тўлаган тақдирда, Академия ректорининг магистратура талабалари сафига қабул қилиш ҳақида буйруғи чиқарилади.

37. Тўлов-контракт асосида дарсга қўйилган талабалар шартномада белгиланган муддатларда тўлов суммасининг тегишли қисмини тўлиқ тўлашлари лозим.

Тўлов-контракт бўйича шартнома шартларини белгиланган муддатда бажармаган талабалар Академия ректорининг буйруғига асосан ўқишдан четлаштирилади.

6-боб. Якунловчи қоида

38. Ушбу Низом талаблари бузилишида айбдор бўлган шахслар қонунчилик ҳужжатларида белгиланган тартибда жавоб беради.

